

dari pada hukum-hukum Islam. Ini dapat dilihat tentang perkara yang terjadi di dalam Rang Undang-undang Hukum Orang-orang Islam yang ditarik untuk disemak semula. Perkara yang sedemikian itu dengan sendirinya menerbitkan sangkaan-sangkaan yang tidak digemari ke atas majlis itu seolah-olah membuat sesuatu undang-undang hukumnya bertentangan dengan hukum Islam untuk digunakan *makhṣūṣ* kepada orang-orang Islam sahaja.

Kita berharap dengan sangat kerajaan Singapura menimbang dan memikirkan semula tentang kedudukan seorang yang memegang jawatan yang mustahak seperti Peguam Agung itu untuk memegang sesuatu jawatan di dalam sebuah Majlis yang selalu perkara-perkaranya ada sangkul paut dengan jabatannya.

Kita berharap supaya Encik Ahmad bin Mohamed Ibrahim tidaklah duduk di dalam Majlis itu untuk menjauhkan daripada segala prasangka bahawa majlis itu sebenarnya tidak mewakili suara umat Islam Singapura. Dengan pandangan ini tidaklah bermakna yang kita tidak menghargakan kelayakan dan kebolehan beliau. Kebolehannya adalah kita sanjung dan hormati tetapi kedudukannya di dalam jabatannya adalah menjadi sebab beliau menurut pandangan kita tidak molek beliau duduk sebagai ahli Majlis Penasihat Islam.

\* \* \*

#### **Penampungan Kanak-Kanak Yang Tak Terkawal**

Di kota-kota besar, terutamanya seperti Singapura ini, banyak tempat-tempat hiburan dan banyak hal-hal yang boleh

dipandang; dan banyak pula tempat-tempat yang boleh merehatkan diri dan menjauhkan diri berhari-hari dari rumah seseorang. Ini biasanya berlaku bagi kanak-kanak yang baharu meningkat kepada umur sepuluh dengan lima belas tahun.

Kanak-kanak seperti ini mulanya banyak bercampur dengan kawan-kawannya dan lalu tidak berapa mengendahkan pelajarannya yang didapatnya di sekolah-sekolah. Dengan itu maka mulailah lemah pelajarannya dan lama-kelamaan lalu kemahuan untuk belajar hilang langsung. Kanak-kanak itu keluar dan masuk rumahnya dengan sesukanya sahaja sedang ibu bapanya, terutamanya ayahnya pada umumnya tidak banyak masanya di rumah.

Kanak-kanak yang umurnya peringkat seperti ini banyak berkeliaran di sana sini dan banyaklah daripada mereka yang tidak dapat meneruskan sekolahnya daripada sekolah rendah kepada sekolah menengah kerana umumnya mereka jatuh di dalam peperiksaan dan kemahuan belajar tidak ada.

Mereka akhirnya bercampur dengan kanak-kanak nakal, mengukur jalan siang malam, dan jarang mereka menjadi kanak-kanak yang baik kerana mereka sentiasa bercampur dengan kanak-kanak nakal. Umumnya ibu bapanya tidak dapat mengawal mereka kerana masing-masing dengan halnya.

Untuk menghadapi kanak-kanak nakal, kerajaan telah mengadakan satu tempat mereka belajar terkenal dengan nama “Sekolah Jameson”. Di sana, kanak-kanak yang telah melakukan kejahatan atau melanggar undang-undang negeri diperintahkan ditahan di sana untuk dididik. Ini satu langkah yang

baik tetapi ini tertentu bagi kanak-kanak yang sudah membuat “kejahanan” tetapi bagaimana halnya dengan kanak-kanak yang terlebih banyak yang belum melakukan sesuatu kesalahan?

Kanak-kanak ini akan terbiar dan sentiasa terbiar. Mereka akan bercampur dengan kanak-kanak nakal dan lama-kemalaan akan bersekutu pula mereka masuk di dalam kumpulan geng merompak, mencuri dan mengugut meminta sesuap<sup>3</sup> kepada orang.

Kedudukan kanak-kanak yang terbiar atau sukar dikawal ini hendaknya diadakan penampungan. Ibu bapa, terutamanya ibu bapa Islam, tidak ada arah hendak menghantarkan anak-anaknya atau menjauhkan mereka daripada kejahanan-kejahanan itu. Hendak dihantarkan ke sekolah, kemahuannya hendak belajar tidak ada. Dikerasi mereka melarikan diri dari rumahnya. Ini lebih-lebih berbahaya lagi.

Hendak dihantarkan masuk ke Sekolah Jameson – di sana hanya diuntukkan kepada kepada kanak-kanak yang melanggar hukuman negeri atau mengacau keamanan. Hendak dihantarkan ke Boys Town, mereka mengetahui bahawa tempat ini dipunyai oleh orang-orang Kristian dan mereka takut anak-anaknya terbawa-bawa oleh agama itu.

Dengan kerana itu, sudah tiba masanya kerajaan mengadakan sekolah penampungan untuk kanak-kanak yang tidak dapat dikawal ini untuk mereka diletakkan di sana belajar. Mereka hendaklah ditempatkan di sana di dalam masa belajar dengan diadakan didikan-didikan akhlak dan pelajaran-pelajaran yang boleh

membawanya hidup, kemudiannya menjadi orang yang baik dengan keadaan pelajaran-pelajaran seperti yang disusun di Boys Town itu.

Kita berharap kerajaan Singapura khususnya dan Persekutuan Tanah Melayu umumnya dapat mengadakan sekolah-sekolah penampungan ini untuk menjauhkan kanak-kanak yang terbiar atau tidak dapat dikawal itu terjauh daripada kejahanan yang tidak dikehendaki adanya oleh sesebuah negara.

---



*Beberapa orang ulama Islam dari Rusia kelihatan sedang menerima naskah-naskah Qur'an sebagai hadiah daripada kerajaan Republik Arab Bersatu.*

<sup>3</sup> Perkataan sebenar ialah sesuatu